

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

RJEŠENJE

**po Prijavi namjere koncentracije između društava Pepsico Investments (Europe) I B.V.,
Utrecht, Holandija i Marbo d.o.o. za proizvodnju i trgovinu Laktaši, Bosna i Hercegovina**

**Sarajevo
Juli, 2008. godine**



Broj: 01-03-26-013-22-II/08
Sarajevo, 24.07.2008. godine

Na osnovu člana 25. stav (1) tačka e), člana 42. stav (1) tačka d), a u skladu s članom 12., 14., 16. i 18. Zakona o konkurenciji („Službeni glasnik BiH“, br. 48/05 i 76/07), po Prijavi namjere koncentracije između privrednog subjekta *Pepsico Investments* (Europe) I B.V., Zonnebaan 35, 3542EB, Utrecht, Holandija, zastupanog po zajedničkoj advokatskoj kancelariji *Karanović & Nikolić*, Lepenička 7, 11000 Beograd, Republika Srbija, i privrednog subjekta *Marbo d.o.o.* za proizvodnju i trgovinu *Laktaši*, Sportski centar bb, Laktaši, Bosna i Hercegovina, zaprimljenu pod brojem 01-03-26-013-II/08 dana 21.04.2008.godine, Konkurencijsko vijeće, na 70. (sedamdesetoj) sjednici održanoj dana 24. 07. 2008. godine, donijelo je

R J E Š E N j E

1. Ocjenjuje se dopuštenom koncentracija koja će nastati na tržištu slanih grickalica u Bosni i Hercegovini i to sticanjem kontrole kupovinom 100,0% dionica privrednog subjekta *Marbo d.o.o. za proizvodnju i trgovinu Laktaši*, Sportski centar bb, Laktaši, Bosna i Hercegovina, od strane privrednog subjekta *Pepsico Investments* (Europe) I B.V., Zonnebaan 35, 3542EB, Utrecht, Holandija.
2. Ovo Rješenje o koncentraciji upisuje se u Registar koncentracija.
3. Ovo Rješenje je konačno i bit će objavljeno u „Službenom glasniku BiH“, službenim glasnicima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je, u smislu člana 16. stav (1) Zakona o konkurenciji (u daljem tekstu: Zakon), dana 21.04.2008. godine, zaprimilo Prijavu namjere koncentracije broj 01-03-26-013-II/08 (u daljem tekstu: Prijava) privrednog subjekta *Pepsico Investments* (Europe) I B.V., Zonnebaan 35, 3542EB, Utrecht, Holandija (u daljem tekstu: *Pepsico Investments* ili Podnosilac prijave), zastupanog po zajedničkoj advokatskoj kancelariji *Karanović & Nikolić*, Lepenička 7, 11000 Beograd, Republika Srbija, po kojoj *Pepsico Investments* namjerava postati 100,0% vlasnik privrednog subjekta *Marbo d.o.o.* za proizvodnju i trgovinu *Laktaši*, Sportski centar bb, Laktaši, Bosna i Hercegovina (u daljem tekstu: *Marbo d.o.o.* *Laktaši*).

Uvidom u dostavljenu Prijavu utvrđeno je da ista nije kompletna, te da je treba dopuniti u smislu člana 30. stav (1) Zakona i člana 8., 9. i 10. Odluke o načinu podnošenja prijave i kriterijumima za ocjenu koncentracija privrednih subjekata („Službeni glasnik BiH“ broj 95/06), te je zatražena dopuna Prijave dana 07.05.2008. godine broj: 01-03-26-013-3-II/08 i dana 30.05.2008. godine broj: 01-03-26-013-9-II/08.

Podnosilac prijave je dopunio istu i traženu dokumentaciju dostavio dana 21.05.2008. godine broj: 01-03-26-013-6-II/08, dana 22.05.2008. godine broj: 01-03-26-013-7-II/08, dana 30.05.2008. godine broj: 01-03-26-013-8-II/08, dana 06.06.2008. godine broj: 01-03-26-013-10-II/08, dana 10.06.2008. godine broj: 01-03-26-013-12-II/08 i broj: 01-03-26-013-13-II/08, dana 13.06.2008. godine broj: 01-03-26-013-14-II/08, dana 16.06.2008. godine broj: 01-03-26-013-15-

II/08, dana 17.06.2008. godine broj: 01-03-26-013-16-II/08 i broj: 01-03-26-013-17-II/08 i dana 19.06.2008. godine broj: 01-03-26-013-19-II/08.

Konkurencijsko vijeće je dana 04.07.2008. godine dopisom broj 01-03-26-013-20-II/08 Podnosiocu prijave izdalo Potvrdu o prijemu uredne i kompletne Prijave (u daljem tekstu: Potvrda), u smislu člana 30. stav (3) Zakona.

Podnosilac prijave je, u smislu člana 30. stav (2) Zakona, naveo da je podnio zahtjev za ocjenu koncentracije nadležnom tijelu za konkurenciju Republike Srbije.

Konkurencijsko vijeće u postupku ocjene dopuštenosti koncentracije je utvrdilo da je Prijava namjere koncentracije podnesena u smislu člana 16. stav (1) Zakona, tj. blagovremeno.

1. Učesnici koncentracije

Učesnici predmetne koncentracije su privredni subjekt Pepsico Investments (Europa) I B.V., Zonnebaan 35, 3542EB, Utrecht, Holandija i privredni subjekt Marbo d.o.o. za proizvodnju i trgovinu Laktaši, Sportski centar bb, Bosna i Hercegovina.

1.1. Privredni subjekt Pepsico Investments (Europe) I B.V.

Privredni subjekt Pepsico Investments (Europa) I B.V. je društvo koje je osnovano i postoji u skladu sa pravom Holandije, s registrovanim sjedištem na adresi Zonnebaan 35, 3542EB, Utrecht, Holandija, registrovano u trgovačkom registru Privredne komore za Midden (Središnju) Holandiju, pod brojem 32067090 dana 08.12.1993. godine. Osnovne djelatnosti privrednog subjekta su proizvodnja i distribucija gaziranih bezalkoholnih napitaka, sokova i slanah grickalica. Privredni subjekt Pepsico Investments je zavisno društvo Pepsico Inc. Grupacije (u daljem tekstu: Pepsico Grupa), koje je jedno od vodećih svjetskih proizvođača hrane i pića.

Pepsico Grupa se sastoji od: (1) *Frito Lay Sjeverna Amerika* čija je osnovna djelatnost proizvodnja i distribucija brendiranih grickalica; (2) *PepsiCo Beverages Sjeverna Amerika* čija je osnovna djelatnost proizvodnja i distribucija koncentrata napitaka, sirupa polu-proizvoda i gotovih proizvoda Pepsi; (3) *PepsiCo International* čija je osnovna djelatnost proizvodnja i distribucija slanah i slatkih grickalica brendova i (4) *Quaker Foods Sjeverna Amerika* čija je osnovna djelatnost proizvodnja i distribucija cerealijskih, pirinča, pasti i drugih brendiranih proizvoda. PepsiCo International sačinjavaju svi Pepsico proizvođači u Velikoj Britaniji, Evropi, Aziji, Srednjem Istoku i Africi, gdje pripada i Pepsico Investments (Europa) I B.V..

Prema podacima iz Prijave privredni subjekt Pepsico Investments (Europa) I B.V. nema povezanih privrednih subjekata niti je (in)direktni vlasnik dionica (10,0% i više) bilo kojeg privrednog subjekta u Bosni i Hercegovini.

1.2. Privredni subjekt Marbo d.o.o. za proizvodnju i trgovinu Laktaši

Privredni subjekt Marbo d.o.o. za proizvodnju i trgovinu Laktaši, sa sjedištem na adresi Sportski centar bb, Bosna i Hercegovina, registrovan je u Osnovnom sudu u Banja Luci dana 19.04.2000. godine pod registarskim brojem 1-11487-00. Osnovne djelatnosti privrednog subjekta Marbo d.o.o. Laktaši su proizvodnja i prodaja grickalica u Bosni i Hercegovini, uključujući uzgajanje i čuvanje krompira, proizvodnju čipsa, krompir pahuljica i sl..

Vlasnici udjela u privrednom subjektu Marbo d.o.o. su privredni subjekt Pacific Services Establishment, sa registrovanim sjedištem na adresi Vaduz, Lihtenštajn, registrovan u Registru privrednih subjekata Lihtenštajna pod brojem FL-0002.245.617-6, vlasnik 50,0% udjela, i privredni subjekt Starline Services Establishment, sa registrovanim sjedištem na adresi Vaduz, Lihtenštajn, registrovan u Registru privrednih subjekata Lihtenštajna pod brojem FL-0002.245.617-7, vlasnik 50,0% udjela u Marbo d.o.o. Laktaši.

Privredni subjekt Marbo d.o.o. Laktaši ima pet distributivnih centara, koji su glavne logističke tačke za dalju distribuciju proizvoda, i to u: Laktašima, Bihaću, Sarajevu, Tuzli i Mostaru.

Marbo d.o.o. Laktaši ima dva društva sestre, i to: Marbo Product d.o.o. Beograd, Republika Srbija i Marbo Product d.o.o. Zagreb, Republika Hrvatska, što predstavlja Marbo Grupu.

Prema podacima iz Prijave privredni subjekt Marbo d.o.o. Laktaši nema povezanih privrednih subjekata niti je (in)direktni vlasnik dionica (10,0% i više) bilo kojeg privrednog subjekta u Bosni i Hercegovini.

2. Obaveza prijave namjere koncentracije

Na osnovu ostvarenog godišnjeg prihoda učesnika koncentracije na dan 31.12.2007. godine proizašla je obaveza prijave namjere koncentracije, u smislu člana 14. stav (1) tačka a) Zakona.

Ukupni prihod učesnika koncentracije na dan 31.12.2007. godine iznosi:

Tabela 1.

Konsolidirani prihod (KM)	Marbo d.o.o. Laktaši	Marbo Grupa	Pepsico Investments	Pepsico Grupa
Svijet	(..)* ¹	(..)*	(..)*	(..)*
Bosna i Hercegovina	(..)*	(..)*	-	(..)*

Ukupni prihodi učesnika koncentracije ostvareni prodajom roba na svjetskom tržištu iznose preko 100.000.000,00 KM po završnom računu u godini koja je prethodila koncentraciji, pri čemu je privredni subjekt Marbo d.o.o. Laktaši registrovan na teritoriji Bosne i Hercegovine. Zbog toga, u skladu sa članom 14. stav (1) Zakona, učesnici koncentracije obavezni su podnijeti Prijavu.

3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti koncentracije primjenilo odredbe Zakona, Odluke o utvrđivanju relevantnog tržišta („Službeni glasnik BiH“, broj 18/06), te Odluke o načinu podnošenja prijave i kriterijumima za ocjenu koncentracija privrednih subjekata.

4. Pravni osnov i oblik koncentracije

Pravnim osnovom koncentracije smatra se Ugovor o kupovini udjela u kapitalu (u daljem tekstu: Ugovor) u privrednim subjektima Marbo d.o.o. za proizvodnju i trgovinu Laktaši, Bosna i Hercegovina, Marbo Product d.o.o. Beograd, Republika Srbija i Marbo Product d.o.o. Zagreb, Republika Hrvatska, sklopljen dana 09. aprila 2008. godine u Cirihu, Švajcarska Konfederacija, između privrednog subjekta Pepsico Investments (Europa) I B.V. (u daljem tekstu: Pepsico Investments ili kupac), i privrednih subjekata Pacific Services Establishment i Starline Services Establishment (u daljem tekstu: Prodavci).

Prodavci su jedini vlasnici privrednog subjekta Marbo d.o.o. Laktaši i njegovih sestrijskih društava Marbo Product d.o.o. Beograd, Republika Srbija i Marbo Product d.o.o. Zagreb, Republika Hrvatska.

¹ (..)* podaci se smatraju poslovnom tajnom u smislu člana 38. Zakona o konkurenciji

Predmetnim Ugovorom privredni subjekt Pepsico Investments (Europa) I B.V. stiće 100,0% udio u privrednom subjektu Marbo d.o.o. Laktaši i njegovim sestrinskim društvima, Marbo Product d.o.o. Beograd i Marbo Product d.o.o. Zagreb.

Konkurencijsko vijeće je utvrdilo da je pravni oblik koncentracije sticanje kontrole jednog privrednog subjekta (Pepsico Investments) nad drugim privrednim subjektom (Marbo d.o.o. Laktaši), kupovinom 100,0 % dionica, u skladu s članom 12. stav (1) tačka b) pod 1) Zakona.

5. Relevantno tržište

Relevantno tržište, u smislu člana 3. Zakona, te članova 4., 5. i 6. Odluke o utvrđivanju relevantnog tržišta, čini tržište određenih proizvoda (usluga) koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvaća sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta relevantno tržište u geografskom smislu obuhvaća cijelu ili dio teritorije Bosne i Hercegovine, na kojoj tržišni konkurenti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Prilikom analize relevantnog tržišta učesnika koncentracije Konkurencijsko vijeće je utvrdilo da je relevantno tržište proizvoda koncentracije tržište slanih grickalica (kikiriki i orasi, čips, štapići, kukuruzne grickalice, ekspanzirane grickalice, perece, slani keks, kokice, ribice, krekeri i tost grickalice).

Relevantnim geografskim tržištem smatra se tržište Bosne i Hercegovine.

Slijedom gore navedenog, relevantnim tržištem koncentracije smatra se tržište slanih grickalica na cijeloj teritoriji Bosne i Hercegovine.

6. Analiza relevantnog tržišta

Podnosilac prijave je u Prijavi dostavio podatke o tržišnom udjelu učesnika koncentracije na relevantnom tržištu, kao i tržišne udjele njihovih konkurenata.

Tržišni udjeli učesnika koncentracije i njihovih glavnih konkurenata na relevantnom tržištu slanih grickalica u Bosni i Hercegovini prikazana su u Tabeli 2.

Tabela 2.

Rb	Privredni subjekt	Tržišni udjeli (%)
1.	Marbo Grupa	34,0
2.	Kellys, Austrija	21,0
3.	Štark, Srbija	10,0
4.	Pepsico Grupa	2,0
5.	Ostali	33,0
	Ukupno	100,0

Privredni subjekt Pepsico Investments uglavnom se bavi proizvodnjom i prodajom gaziranih bezalkoholnih napitaka, sokova i slanih grickalica. Slane grickalice, koje proizvodi privredni subjekt Pepsico Investments, prodaju se u Bosni i Hercegovini preko nezavisnih distributera, tako da tržišni udio Pepsico Grupe na relevantnom tržištu u BiH je neznatan, iznosi 2,0%.

Privredni subjekt Marbo d.o.o. Laktaši se bavi proizvodnjom i distribucijom grickalica u Bosni i Hercegovini, uključujući uzgajanje i čuvanje krompira, proizvodnju čipsa, krompir pahuljica i sl. Kao što se može vidjeti iz Tabele 2. Tržišni udio Marbo Grupe na relevantnom tržištu slanih grickalica u BiH iznosi 34,0%.

7. Ocjena koncentracije

Konkurencijsko vijeće je, nakon procjene i analize podataka i utvrđenih činjenica u smislu člana 17. Zakona, utvrdilo da zajedničko tržišno sudjelovanje učesnika koncentracije na relevantnom tržištu u Bosni i Hercegovini iznosi 36,0% i da je ispod 40,0%, u smislu člana 9. Zakona, koji pretpostavlja da privredni subjekt može imati dominantan položaj na relevantnom tržištu. U skladu s navedenim, predmetna koncentracija ne stvara, tj. ne jača dominantan položaj na relevantnom tržištu slanih grickalica na teritoriji Bosne i Hercegovine.

Analizom strukture relevantnog tržišta i tržišnih udjela učesnika koncentracije i njihovih konkurenata (Tabela 2.), Konkurencijsko vijeće je ocijenilo da provođenjem predmetne koncentracije neće doći do značajne promjene strukture relevantnog tržišta s obzirom da je tržišni udio Pepsico Investments neznatan (manje od 2,0%).

Prema tome, predmetna koncentracija mogla bi imati pozitivne efekte na relevantnom tržištu Bosne i Hercegovine, jer će se ulaskom Pepsico Investments na relevantno tržište poboljšati kvalitet relevantnog proizvoda kroz inovacije u proizvodnim i distributivnim kapacitetima Marbo d.o.o. Laktaši što će dovesti do smanjenja troškova, a samim tim i smanjenja cijene relevantnog proizvoda.

8. Administrativna taksa

Na ovo Rješenje podnosioc Prijave, u skladu s članom 2. tarifni broj 107. stav (1) tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

9. Pouka o pravnom lijeku

Protiv ovog Rješenja nije dopuštena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja odnosno od dana njegovog objavljivanja.

Predsjednik

Ibrica Lakišić